

Ich bi jo jetz sed churzem em Unruhestand und drumm würds eus wunder neh
öb er wieterhin mini Värs wänd ghöre und eusi Helge wänd gseh
oder andersch gseit wer euse Uftrett au en Zuekunft will erläbe
de söll das doch bitte jetz bezüge met Hand erhäbe

Zersch schiesst er Karin Käller Suter zäme schreyt in Hörer 39 Prozänt
drufabe goht de Trump uf Venezuela und stürzt det de Präsidiänt
und jetzt wotter de Däne no Grönland chlaue das fräche Mannezemmer
jo und so ein chonnt zu eus as WEF bi dem goht schlemmer wörkli emmer

Mer tüend sinerzyt de 2. Oktober 2001 schriebe
do esch d`Swissair groundet ehri Flugli händ müesse am Bode bliebe
und jetz nach 25 Jahr wo für Olympia werd selektioniert
jo do esch doch tatsächlich em Simi Ammann s`gliche passiert

Du glaubsch es ned eusi SBB ich muss das do erwähne
chauft die neue Züg well si belliger send em Schwobeländli äne
ich hoffe jo nor das ufem Lieferschie den de Pries gross und fettdruckt stoht
ned das es euch denne wie eusre Armee mit de neue Kampfjets goht

Ich wett euch do amene ganz eifache Bispiel erkläre was wörd passiere
wenn be de Halberigsinitiative d`Beführwörter chönnted jubiliere

Statt eme richtige grosse Fүүr cha mer de Gmeirot das begründe
düend mer z`Rinike am 1. August nor no Finnecherze azünde
und chonnt jetz dene no s`Fүүrwärksverbot wägem Lärm und em Rauch i de Luft
warted ehr nor den lömmer de halt Tischbombe ed Luft

Einsam und verlasse esch er gstande be eus am Waldrand unde
doch jetz esch au der letschti Maschte vo der alte Leitig verschwunde
debie ben ich der Meinig gsi mer Riniker sige de Spänder
jetzt wo d`Susanne Wille zruggräbst esch für de neu UKW Sänder

Dank eme Sponsor hämmer im Riniker Wald euses Seilbähnli chönne flicke
und dank de Ortsbürger chasch bem Waldhus obe en neue Brunne erblicke
und dank de neue Wägwisser finsch en Wald ie und au weder zrug
jetzt esch euse Forscht de bald me beläbt als d`Altstadt unde in Brugg

Mer send 3 Prozänt mit de Stüre ue und müend spöter velecht de no me
bis uf 126 Prozänt jo wemm vo eus duet das ned weh
drumm gets nur eis fusioniere met Brugg well es freut denn secher die Meische
wenn mer eus wie Villnachere au e neu Badi und en Zeltplatz chönd leische

Wäg de viele Ample hani s`letschte Jahr d`Boustell am Bözbärg kritisiert
jetz hets det nor no 1 oder 2 min Röffel het also funktioniert
doch mer Riniker müend öppe gar ned meine das mer schneller as Ziel düend glange
well uf eusere Boustell do hets jo ersch e huffe Streck und es paar Stange

25 Jahr Gmeindsarbeiter euse Schär Rolf cha jubiliere
jo do gets für eus nor eis em hätzlech z`gratuliere
und em Gmeihus unde do semmer scho froh ohni z`übertriebe
wenn eusi neu Gmeischrieberi nume scho halb solang wördi bliebe

Somet wär für de hötigi Obe euse Uftrett wieder gloffe
und mir tüend wie alli Jahr natürlich wieder druf hoffe
das eus öper en Wyse zahlt jo das wäri mega flott
well mer händ jo ned wie bem Neumärt z`Brugg es Alkohol Verbot

Und zum Schluss gets vo eus no en riese Dank das er am Afang Alli JO gstumme händ
well das esch secher ned sältstverständlich und mer näme das als Komplimänt
öbrigens bemene NEI hätte mer vor em Uftrett ich sägs do ganz ungeniert
so wie eusi Frau Ex-Gmeindamme de Bättel grad ahnegrüehrt

*Der Komedi*₂₆

Wänd er me bsueche? Ich be dehei onder „www.komedi.ch“

Zugabevers:

A der Olympiade z'Italie er send secher alli em Beld
do hamstere eusi Schwyzer Athlete Medallie wie weld
jo ganzi 23 Stück das wärde mer nie meh vergässe
ich vermuete die händ vor em Wettkampf zum Zmorge alli Aromatchips gässe